

ՀԱՍՏԱՏՎԱԾ Է

ՀՌՀ ԳԻՏԱԿԱՆ ԽՈՐՀՐԳԻ

2017 թ. հոկտեմբերի 3 թիվ 28 որոշմամբ

(2019թ. մարտի 21-ի խմբագրմամբ)

ՀՌՀ ռեկտոր Ա.Ռ. Գարբինյան



ՀԱՅ-ՌՈՒՍԱԿԱՆ ՀԱՄԱԼՍԱՐԱՆԻ  
ՀԱՅԿԱԿԱՆ ԲԱԺԱՆՍՈՒՆՔԻ  
ՌՈՒՍԱՆՈՂԱԿԱՆ ՆՊԱՍՏՆԵՐԻ ՏՐԱՄԱԴՐՄԱՆ  
ԿԱՆՈՆԱԿԱՐԳ

1. ԸՆԴՀԱՆՈՒՐ ԴՐՈՒՅԹՆԵՐ

1.1. Հայ-Ռուսական համալսարանի (այսուհետ՝ ՀՌՀ) ուսանողական նպաստների տրամադրման կանոնակարգը (այսուհետ՝ Կանոնակարգ) սահմանում է ՀՌՀ-ում ուսման վճարի լրիվ կամ մասնակի փոխհատուցման ձևով ուսանողական նպաստների հատկացման կարգը և պայմանները:

1.2. Սույն կանոնակարգը մշակվել է հաշվի առնելով՝

- Հայաստանի Հանրապետության «Կրթության մասին» 14 ապրիլի 1999 թ. № ՀՕ-297 օրենքի դրույթները;
- Հայաստանի Հանրապետության «Բարձրագույն և հետբուհական մասնագիտական կրթության մասին» 14 դեկտեմբերի 2004 թ. № ՀՕ- 62-Ն օրենքի դրույթները;
- Հայաստանի Հանրապետության Կառավարության «Հայաստանի Հանրապետության բարձրագույն ուսումնական հաստատություններում ուսանողական նպաստ և պետական կրթաթոշակ տալու կարգը հաստատելու, Հայաստանի Հանրապետության Կառավարության 2005 թվականի սեպտեմբերի 8-ի № 1986-Ն և 2005 թվականի սեպտեմբերի 15-ի № 2114-Ն որոշումներն ուժը կորցրած ճանաչելու մասին» 27 հուլիսի 2006 թվականի № 1183-Ն որոշման դրույթները;
- գործող այլ իրավական ակտերի դրույթները;
- ՀՌՀ-ի կանոնադրության դրույթները:

1.3. Ուսանողական նպաստը լրիվ կամ մասնակի փոխհատուցում է ուսանողի ուսման վճարը՝ Հայաստանի Հանրապետության պետական բյուջեի ծախսային մասում նախատեսված միջոցների, ՀՌՀ-ի ֆինանսական միջոցների, ինչպես նաև Հայաստանի Հանրապետության օրենսդրությամբ չարգելված այլ աղբյուրների հաշվին:

1.4. Սույն կանոնակարգի դրույթները տարածվում են բակալավրի և մագիստրոսի կրթական ծրագրերով առկա ուսուցման ձևով սովորող ուսանողների վրա:

1.5. Հեռակա ուսուցման ձևով սովորող ուսանողներին Հայաստանի Հանրապետության պետական բյուջեի ծախսային մասում նախատեսված միջոցների հաշվին ուսանողական նպաստների տրամադրման կարգը և պայմանները սահմանվում են ՀՀ գործող օրենսդրությամբ:

## **2. ՈՒՍԱՆՈՂԱԿԱՆ ՆՊԱՍՏԻ ՁԵՎՈՎ ՈՒՍՄԱՆ ՎՃԱՐԻ ԼՐԻՎ ՓՈԽՀԱՏՈՒՑՈՒՄ ՏՐԱՄԱԴՐԵԼՈՒ ԿԱՐԳՆ ՈՒ ՊԱՅՄԱՆՆԵՐԸ**

2.1. Ուսանողական նպաստի ձևով ուսման վճարի լրիվ փոխհատուցումը Հայաստանի Հանրապետության պետական բյուջեի ծախսային մասում նախատեսված միջոցների հաշվին տրամադրվում է՝

2.1.1. Մեկ ուսումնական տարվա քննությունների և ստուգաբաժնի արդյունքներով առավել բարձր գնահատականներ ունեցող ուսանողներին՝ մրցութային կարգով,

2.1.2. Օրենքով նախատեսված հետևյալ սոցիալական խմբերում ընդգրկված անձանց՝

ա) առանց ծնողական խնամքի մնացած ուսանողներին և նրանց թվին պատկանող անձանց՝ համաձայն «Առանց ծնողական խնամքի մնացած երեխաների սոցիալական պաշտպանության մասին» Հայաստանի Հանրապետության օրենքի,

բ) 1-ին և 2-րդ խմբերի հաշմանդամներին և հաշմանդամ երեխայի կարգավիճակ ունեցող անձանց՝ համաձայն «Հայաստանի Հանրապետությունում հաշմանդամների սոցիալական պաշտպանության մասին» Հայաստանի Հանրապետության օրենքի,

գ) զոհված զինծառայողի երեխա-ուսանողներին՝ համաձայն «Զինծառայողների և նրանց ընտանիքների անդամների սոցիալական ապահովության մասին» Հայաստանի Հանրապետության օրենքի.

դ) պարտադիր ժամկետային զինվորական ծառայության ընթացքում հաշմանդամ դարձած ուսանողներին՝ համաձայն «Զինծառայողների և նրանց ընտանիքների անդամների սոցիալական ապահովության մասին» Հայաստանի Հանրապետության օրենքի:

2.1.3. պետության համար առաջնահերթություն և կարևորություն ներկայացնող մասնագիտություններով նպատակային ուսուցմամբ ընդունված ուսանողներին:

2.2. Ընդհանուր մրցութից դուրս, պարտադիր ժամկետային զինվորական ծառայությունից զորացրված Հայաստանի Հանրապետության կառավարության կողմից հատկացված անվճար տեղերի հաշվին ընդունված ուսանողները՝ որպես նպատակային ուսուցմամբ ընդունվածներ, օգտվում են իրենց արտոնությունից մինչև ուսումնառության ավարտը:

2.3. Սույն կանոնակարգի 2.1.2. կետի «ա» և «գ» ենթակետերում և 2.1.3. կետում նշված կարգավիճակ ունեցող ուսանողներին ուսանողական նպաստներ տրամադրվում են 1-ին կուրսից մինչև տվյալ կրթական ծրագրով ուսումնառության ավարտը:

2.4. Սույն կանոնակարգի 2.1.2. կետի «բ» և «դ» ենթակետերում նշված կարգավիճակ ունեցող ուսանողներին համապատասխան փաստաթղթերի առկայության դեպքում, ուսանողական

նպաստներ տրամադրվում են 1-ին կուրսի սկզբում և վերանայվում է յուրաքանչյուր ուսումնական տարվա վերջում:

2.5. Հայաստանի Հանրապետության կառավարությունը յուրաքանչյուր տարի Հայաստանի Հանրապետության տվյալ տարվա պետական բյուջեով բարձրագույն ուսումնական հաստատությունների համար նախատեսված միջոցների սահմաններում՝ ըստ բուհերի, մասնագիտությունների և կրթական ծրագրերի բաշխում է պետության կողմից տրվող ուսանողական նպաստների քանակը, որը տեղափոխվում է կուրսից կուրս:

2.6. ՀՌՀ-ի բակալավրի կրթական ծրագրով առաջին կուրս ընդունված ուսանողներին ուսանողական նպաստի ձևով ուսման վճարի լրիվ փոխհատուցում տրամադրվում է Հայաստանի Հանրապետության պետական բուհերի ընդունելության կանոններով սահմանված կարգով: Հաջորդ կուրսերում վերոնշյալ ուսանողների ուսանողական նպաստը տրամադրվում է սույն կանոնակարգի 2.1.1. կետով ամրագրված սկզբունքով:

2.7. Սույն կանոնակարգի 2.1.1. կետում նշված ուսանողների համար մրցույթը կազմակերպվում է մինչև յուրաքանչյուր տարվա սեպտեմբերի 25-ը՝ նախորդող ուսումնական տարվա յուրաքանչյուր կիսամյակում հանձնած քննությունների և ստուգարքների արդյունքների (ՍՈԳ-ի) հիման վրա: ՍՈԳ-ը հաշվարկվում է հարյուրերորդականի ճշտությամբ:

2.8. Ուսման վճարի լրիվ փոխհատուցման համար անցկացվող մրցույթին չեն կարող մասնակցել այն ուսանողները, որոնք նախորդող ուսումնական տարվա որևէ կիսամյակում ունեցել են ակադեմիական պարտք, բացի հարգելի պատճառով ակադեմիական պարտք ունեցող/քննություններին և ստուգարքների չներկայացած/ ուսանողների:

2.9. Ուսումնական տարվա քննությունների և ստուգարքների արդյունքում միննույն պայմանների դեպքում հավասար միավորներ ունեցող երկու և ավելի ուսանողների պարագայում՝ երկրորդ կուրսում առավելությունը տրվում է առաջին կուրսի վերջին կիսամյակի քննաշրջանի արդյունքում առավել բարձր առաջադիմություն ցուցաբերած ուսանողներին, հաջորդ կուրսերում՝ նախորդ ուսումնական տարվա, իսկ վերջինիս հավասարության դեպքում՝ դրան նախորդող ուսումնական տարվա քննությունների և ստուգարքների արդյունքներով առավել բարձր առաջադիմություն ցուցաբերած ուսանողներին:

2.10. Ըստ առաջադիմության՝ ՍՈԳ-ի, ձևավորվում է տվյալ կուրսի տվյալ մասնագիտության ուսման վճարի լրիվ փոխհատուցման իրավունք ունեցող ուսանողների ցուցակը:

2.11. Սույն կանոնակարգի 2.10.-րդ կետում նշված ցուցակը ՀՌՀ-ի համապատասխան ինստիտուտի տնօրենի կողմից ներկայացվում է ՀՌՀ-ի ռոտացիոն հանձնաժողովի քննարկմանը:

2.12. ՀՌՀ-ի ռոտացիոն հանձնաժողովի կազմում ընդգրկվում են ՀՌՀ-ի ռեկտորը՝ որպես հանձնաժողովի նախագահ, ՀՌՀ-ի ինստիտուտների տնօրենները, ուսումնական մասի վարիչը, իրավաբանական դեպարտամենտի ղեկավարը: Ռոտացիոն հանձնաժողովի

քարտուղար է նշանակվում ուսումնական մասի գլխավոր մասնագետը՝ հայկական բաժանմունքի համար պատասխանատուն:

2.13. Ռոտացիոն հանձնաժողովը ըստ տվյալ կուրսի տվյալ մասնագիտությանը հատկացված ուսանողական նպաստի ձևով ուսման վճարի լրիվ փոխհատուցմամբ տեղերի քանակի իրականացում է մրցույթ և կազմում է ուսման վճարի լրիվ փոխհատուցման իրավունք ունեցող ուսանողների ցուցակը: Ցուցակի հաստատման համար կազմվում է արձանագրություն, որտեղ գրանցվում են ռոտացիոն հանձնաժողովի անդամների կողմից արտահայտված կարծիքները և հնարավոր վերապահումները: Արձանագրությունը և մրցութային ցուցակը ստորագրվում են ռոտացիոն հանձնաժողովի նախագահի և անդամների կողմից:

2.14. Ռոտացիոն հանձնաժողովի կողմից հաստատված ցուցակները մեկօրյա ժամկետում տեղադրվում են ՀՌՀ-ի կայքում: Ցուցակների վերաբերյալ դիմում-բողոքները երեք աշխատանքային օրվա ընթացքում պետք է ներկայացվեն ՀՌՀ-ի Ռոտացիոն հանձնաժողովին: Նշված ժամկետի ավարտից հետո Ռոտացիոն հանձնաժողովը քննարկում է ներկայացված դիմում-բողոքները (դրանց առկայության դեպքում), հաստատում է ուսանողական նպաստի ձևով ուսման վճարի լրիվ փոխհատուցում ստացող ուսանողների վերջնական ցուցակները և այն հրամանագրման նպատակով ներկայացնում է ՀՌՀ-ի ռեկտորին:

2.15. ՀՌՀ-ի ռեկտորի հրամանում նշվում է ուսանողական նպաստի տրամադրման ժամկետը՝ տվյալ ուսումնական տարվա սեպտեմբերի 1-ից մինչև հաջորդ տարվա օգոստոսի 31-ը:

2.16. ՀՌՀ-ի ռեկտորի հրամանով ուսման վճարի լրիվ փոխհատուցում ստացող ուսանողների հրամանագրումից հետո ուսանողների այլ ուսումնական հաստատություն կամ այլ մասնագիտություն փոխադրվելու, ինչպես նաև ՀՌՀ-ից ազատվելու դեպքերում ազատված ուսանողական նպաստները, տվյալ ուսումնական տարում, այլ ուսանողներին չեն տրամադրվում:

2.17. Ուսումնառությունն ընդհատած (ժամկետային զինձառայության զորակոչվելու, առողջական վիճակի պատճառով ակադեմիական արձակուրդում գտնվելու, հղիության և ծննդաբերության, ինչպես նաև մինչև 3 տարեկան երեխայի խնամքի դեպքերում) ուսանողը վերականգնվելիս պահպանում է նախկինում ունեցած ուսանողական նպաստ ստանալու իրավունքը:

2.18. Ուսանողական նպաստի ձևով ուսման վճարի լրիվ փոխհատուցման իրավունքից օգտվող ուսանողի կողմից սույն կետով սահմանված պատճառներով ուսումնառությունն ընդհատելու դեպքում ազատված ուսանողական նպաստը նույն կուրսում տվյալ ուսումնական տարում չի օգտագործվում և հետագայում ավելացվում է այն կուրսի տվյալ ուսումնական տարվա ուսանողական նպաստներին, որտեղ ուսանողը վերականգնում է իր ուսանողական իրավունքները:

2.19. ՀՌՀ-ից հեռացվելուց կամ ազատվելուց հետո վերականգնված, այլ բուհերից, ՀՌՀ-ի այլ մասնագիտություններից տեղափոխված ուսանողները, ուսման վճարի լրիվ փոխհատուցման իրավունքից կարող են օգտվել ՀՌՀ-ի տվյալ մասնագիտությունում առնվազն մեկ ուսումնական տարի սովորելուց հետո:

### 3. ՈՒՍԱՆՈՂԱԿԱՆ ՆՊԱՍՏԻ ՁԵՎՈՎ ՈՒՍՄԱՆ ՎՃԱՐԻ ՄԱՍՆԱԿԻ ՓՈԽՀԱՏՈՒՑՈՒՄ ՏՐԱՄԱԴՐԵԼՈՒ ԿԱՐԳԸ ՈՒ ՊԱՅՄԱՆՆԵՐԸ

3.1. Պետությունն ուսանողական նպաստի ձևով ուսման վճարի մասնակի փոխհատուցում տրամադրում է յուրաքանչյուր տարի Հայաստանի Հանրապետության կրթության և գիտության նախարարության կողմից սահմանված ուսանողի միջին որակական գնահատականի նվազագույն շեմը հաղթահարած և ընտանիքների անապահովության գնահատման համակարգում հաշվառված՝ Հայաստանի Հանրապետության կառավարության կողմից յուրաքանչյուր տարի սահմանվող անապահովության սահմանային միավորից բարձր միավորներ ունեցող ուսանողներին: Նշված նպաստների տրամադրման կարգը և պայմանները սահմանվում են ՀՀ գործող օրենսդրությամբ:

3.2. ՀՌՀ-ը վճարովի համակարգում սովորող ուսանողական համակազմի առնվազն տաս տոկոսին, ուսանողների վճարներից գոյացած բյուջեի առնվազն յոթ տոկոսի չափով, հիմք ընդունելով բարձր առաջադիմությունը և սոցիալական խումբը, իր միջոցների հաշվին իրականացնում է ուսանողական նպաստի ձևով ուսման վճարի մասնակի փոխհատուցում հետևյալ կարգավիճակ ունեցող ուսանողներին.

3.2.1. Սոցիալապես անապահով (ընտանիքների ապահովության սահմանային միավորից բարձր միավոր ունեցող ընտանիքների) ուսանողներին՝ 30 տոկոսի չափով,

3.2.2. 18 տարին լրանալուց հետո առանց ծնողական խնամքի մնացած ուսանողներին՝ մինչև 23 տարին լրանալը՝ 50 տոկոսի չափով,

3.2.3. 23 տարին չլրացած միակողմանի ծնողազուրկ (միածնող) ուսանողներին՝ 50 տոկոսի չափով,

3.2.4. մինչև երեք տարեկան երեխա ունեցող ուսանողներին՝ 50 տոկոսի չափով,

3.2.5. երեք և ավելի անչափահաս, կամ երեք և ավելի ուսանող երեխա ունեցող ընտանիքների ուսանողներին՝ 30 տոկոսի չափով,

3.2.6. 1-ին կամ 2-րդ խմբի հաշմանդամ, այդ թվում՝ հաշմանդամ ազատամարտիկ ծնող ունեցող ուսանողներին՝ 30 տոկոսի չափով,

3.2.7. Մարտական հերթապահություն իրականացնող զորամասերում մարտական հերթապահության մեջ ընդգրկված պարտադիր ժամկետային զինվորական ծառայություն անցած ուսանողներին՝ 30 տոկոսի չափով,

3.2.8. Սոցիալապես անապահով (ընտանիքների ապահովության գնահատման համակարգում հաշվառված, անապահովության 0 միավորից բարձր միավոր ունեցող ընտանիքների) ուսանողներին՝ 20 տոկոսի չափով,

3.2.9. Ուսանողական նպաստների համակարգում չընդգրկված, երկու կիսամյակ անընդմեջ առավել բարձր առաջադիմություն ցուցաբերած ուսանողներին, որոնք ուսանողական նպաստի ձևով ուսման վճարի լրիվ փոխհատուցման համար անցկացված փոխատեղման մրցույթի արդյունքում զրկվել են նպաստի իրավունքից մինչև 0.1 միավոր տարբերության պատճառով՝ 50 տոկոսի չափով,

3.2.10. ուսանողին, որի ծնողներից մեկը առնվազն երեք տարի հանդիսանում է ՀՌՀ-ի հիմնական աշխատող՝ 50 տոկոսի չափով,

3.2.11. ՀՀ զինված ուժերում պարտադիր զինվորական ծառայություն անցած մագիստրատուրայի ուսանողներին՝ 25-50 տոկոսի չափով,

3.2.12. ՀՌՀ-ում վճարովի համակարգում սովորող երկու և ավելի ուսանողներին՝ կախված ուսանողների վճարներից գոյացած բյուջեից չափից,

3.2.13. Բարձր առաջադիմության դեպքում՝ ՀՌՀ-ի կողմից սահմանված ամփոփիչ ՄՈԳ-ի շեմը հաղթահարելու պայմանով՝ սկսած 10 տոկոսից,

3.2.14. Առանձնահատուկ դեպքերում, այլ կարգավիճակ ունեցող ուսանողներին՝ ՀՌՀ-ի ռեկտորի որոշմամբ սահմանված չափով:

3.3 Երկու և ավելի կարգավիճակների համապատասխանող, կամ մի քանի արտոնություններին հավակնելու դեպքում ուսանողը կարող է օգտվել դրանցից միայն մեկից, որի դեպքում կիրառվում է մասնակի փոխհատուցման առավելագույն չափը:

3.4 ՀՌՀ-ի կողմից սույն կանոնակարգի 3.2 կետով տրամադրվող ուսանողական նպաստի ձևով ուսման վճարի մասնակի փոխհատուցումից ուսանողը կարող է օգտվել սահմանված միջին որակական գնահատականի (ՄՈԳ) շեմը հաղթահարելու դեպքում, բացի սույն Կանոնակարգի 3.2. կետի 3.2.2, 3.2.9, 3.2.10, 3.2.11, 3.2.12 և 3.2.14 ենթակետով սահմանված դեպքերի, որոնց նպաստի ձևով ուսման վճարի մասնակի փոխհատուցումը տրամադրվում է առանց հաշվի առնելու ՄՈԳ-ի շեմը հաղթահարելու փաստը:

3.5 Միջին որակական գնահատականի (ՄՈԳ) շեմը սահմանվում է ՀՌՀ-ի գիտական խորհրդի որոշմամբ:

3.6 Սույն Կանոնակարգի 3.2 կետով սահմանված ուսանողների այն կատեգորիաների համար, որոնք կարող են օգտվել ուսման վճարի մասնակի փոխհատուցումից միայն միջին որակական գնահատականի (ՄՈԳ) շեմը հաղթահարելու դեպքում, փոխհատուցման իրավունքից կարող են օգտվել սկսած առաջին կուրսի երկրորդ կիսամյակից:

3.7 Սույն Կանոնակարգի 3.2 կետի 3.2.10 և 3.2.14 ենթակետերով սահմանված ուսման վճարի մասնակի փոխհատուցումից ուսանողները կարող են օգտվել առաջին կուրսի առաջին կիսամյակից սկսած:

3.8 Սույն Կանոնակարգի 3.2 կետի 3.2.9 ենթակետերով սահմանված ուսման վճարի մասնակի փոխհատուցումից ուսանողները կարող են օգտվել երկրորդ կուրսից սկսած:

3.9 ՀՌՀ-ից հեռացվելուց հետո վերականգնված, այլ բուհերից, ՀՌՀ-ի այլ մասնագիտություններից տեղափոխված ուսանողները, ուսման վճարի մասնակի փոխհատուցման իրավունքից կարող են օգտվել ՀՌՀ-ի տվյալ մասնագիտությունում առնվազն մեկ կիսամյակ սովորելուց հետո:

3.10 Սույն կանոնակարգի 3.2 կետով սահմանված ուսման վճարի մասնակի փոխհատուցող ուսանողական նպաստները տրամադրվում են մեկ ուսումնական կիսամյակով: Ուսման վճարի մասնակի փոխհատուցող նպաստների տրամադրման ժամկետը ավարտվելուց հետո ուսանողը կարող է կրկին դիմել ՀՌՀ նույն կամ այլ հիմքով ուսման վճարը մասնակի փոխհատուցող ուսանողական նպաստ ստանալու համար՝ սույն Կանոնակարգի 3.10 կետով սահմանված ժամկետներում:

3.11 Սույն կանոնակարգի 3.2 կետով սահմանված ուսման վճարի մասնակի փոխհատուցող ուսանողական նպաստները տրամադրվում են ուսանողների դիմումների հիման վրա, որոնց պետք է կցված լինեն համապատասխան փաստաթղթերը: Ուսանողների դիմումները մակագրվում են համապատասխան ինստիտուտի տնօրենի կողմից: Ուսման վճարը մասնակի

փոխհատուցող ուսանողական նպաստները տրամադրվում են ՀՌՀ-ի ռեկտորի հրամանի հիման վրա:

3.12 Ուսման վճարը մասնակի փոխհատուցող ուսանողական նպաստները տրամադրելու վերաբերյալ դիմումներն ընդունվում են յուրաքանչյուր կիսամյակի առաջին չորս շաբաթների ընթացքում: Սույն կետում սահմանված ժամկետների ավարտից հետո ներկայացված ուսման վճարի մասնակի փոխհատուցման վերաբերյալ դիմումները ենթակա չեն քննարկման:

Հայ-Ռուսական համալսարանի  
Գիտ. Խորհուրդ